

四庫全書

集部

欽定四庫全書

集部

林蕙堂全集卷十五

詳校官檢討臣劉錫五

助教臣常循履勘

總校官編修臣王燕緒

校對官助教臣卜維吉

謄錄監生臣茅琳

欽定四庫全書

林蕙堂全集卷十五

湖州府知府吳綺撰

亭泉詩集

五言律

集芝麓先生寓園

雨過雙扉闔花殘景乍清
心憐三月樹氣盡六朝鶯
吟細遲分笋譚深費煮羹
前期還共惜濠濮少人行

又

攜手同心素春庭向晚開小風翻砌藥初月上宮梅醉
好從人習情多耐客來翻愁離別處憔悴是青苔

又

藤蘿看石上今夕又焚香木榻經年改羅衣半夜涼寸
心同寂寞一醉小行藏岍憤情何極蕭蕭鬢已蒼

種菊詩為坦夫賦

籬槿悲搖落涼從此地新淺深皆作致次第似含顰露

下庚申節天高甲子人相看同脉脉爛漫屬天真

又

幽花無俗性寒至轉便娟身世黃農後平生青女前豈
悲時已暮所得地猶偏蕭瑟陶公意孤吟費酒錢

次韻贈伯紫

之子非今士蕭然一褐寬空山吟欲響古道哭無端石
瘦池痕淺霜高水影乾遠遊誠不偶相語愛新寒

雪後送芝麓先生遊淮上

擁褐方憐我并州又送君江干多斷草雪後見斜曛帆
影藏書卷衣香亂水雲逢迎天下慣嚴武況斯文

又

淮水從來勝龍門此暫延繡絲新漂母青桂老遊仙弔
古千秋淚相思五噫篇河梁差足慰聯句有金鈿

次韻寄力臣

客心愁不極日夜大江橫芳草人何處梅花雲又生憂
危觀意氣聚散出才名潦倒楊亭酒登樓念子荆

賦得送秋兼送客送友沂還廣陵

一夜悲風起江山又送秋
白楊搖短策黃葉打輕裘
律向何時暖人添此夜愁
蕭條望天地江海正同流

又

我已悲秋矣秋歸更若何
寒雲生澗壑斜日老藤蘿
吾道非耽酒人生正荷戈
好將風雪意料理到漁蓑

又

日月成何事元冥改素商
園林添冷落道路一蒼茫
雁

失吳天信蟬輕楚客裳殷勤兩攜手惜別在他鄉

又

柳漸無堪折新寒況古城衣寬殘日路酒急大江聲天
遠何堪問雲多不肯晴河梁聞晚吹相送重行行

題姑山草堂贈稼公

斯人乃抱鄰抱鄰竟何之用癖聊存志全生或在癡天
高智井宇雲老石門詩相見長松下孤懷不自持

秋霜

青女司時令嚴威漸次侵雁寒歸國信蟲急到牀音薄
曙愁相見微陰悞至今布衾眠不穩慘慘向晨心

秋江

涼風千古恨江水日悠悠楓葉吹何急蘋花冷自由天
容吳地濶山入楚雲浮擊節誰堪想中流有豫州

秋村

秋光隨野濶靄靄見孤村新秫齊登壑晴溪各到門青
天高雁隼黃葉散難豚荷蓀逢鄰叟相攜老瓦盆

秋圃

淒淒時已及除架愛晨興天老匏瓜種霜輕扁豆藤土
風宜九月吾道在東陵抱甕誠閒事勞生媿未能

秋牕

三徑乾坤在蕭蕭此閉門攤書橫菊影洗硯入蕉痕白
袷吟方健青山夢自溫疎櫺曾不掩一半夕陽昏

秋燈

燈穗搖深碧熒熒向晚陰似將孤客影照入壯夫心吐

焰迴金盃低光動玉琴草堂猶不寐留得伴閒吟

秋扇

懷袖涼風起君王重歲時塵埃自不惜篋笥爾何辭
色冷秦宮畫心傷漢殿詩明年有炎暑翻恐費相思

秋柳

楊柳如名士逢秋早自傷初霜情嫋娜斜日影郎當
眉眼分明甚心絲斷續長誰能憐歲暮翻似早春黃

秋棠

秋卉如春卉秋將半已開小香籠蟋蟀踈影立莓苔淚
似相思種看因欲睡來凭闌憐少婦芳砌幾徘徊

秋蛩

秋到易為響此蟲非自鳴常因孤館夜故作戰場聲百
草霜何苦三更酒不平誰家機杼畔悄覺晚寒生

秋燕

且住無多日翩翩舞素暉祇綠時序改寧是羽毛稀杏
壘成功退梅梁隔歲歸烏衣猶自健雲路敢終違

同鶴問玉少小飲望江干夕照

萬里清秋色臨江晚眺開天風吹放眼雲影下空盃鷺
傍魚簖宿鴉隨客棹來蕭條事行役落日一登臺

真江曉發

遠岸聞人語鳴榔復戒行帆開栖雁路船出打鐘聲白
月前林小青山昨夜晴沉沙何處問空見早潮生

泊燕子磯

歸棹臨江渚維舟就古磯沙痕環白舫山勢學烏衣市

小爭沽酒村寒早閉扉登高愁極目烽火認斜暉

漂母祠

興廢經千古荒祠此復存可知逢世事難得受人恩屠
釣通侯賤壺飧老婦尊偶來憑弔久不獨為王孫

甘羅城

千秋稱利達早貴說甘羅即此留殘堞猶然枕大河古
錢春雨出賈棹夕陽過廣武悲何極蒼茫一浩歌

詠螢限韻

物化關天運宵行點夕靡自從芳甸出長向玉階飛照
久如生彩明多或用微蘭膏有時歇願取續靈暉

又

傍礎熒熒出中庭炯自看何曾窺樺燭竟自惹羅紈入
暑心寧熱經秋色不寒隋宮徒好事芳谷影瀰漫

郊園小集聽曲

紫陌紛車馬芳園竟少隣諸賢同勝賞二月正良辰影
靜花如霰絲寒柳作人況聞清吹發檀板度陽春

又

雲淨飛鴻路天涯
蔣徑開竹深看騎入
花動識鶯來風
細橫瑤笛泉香接羽盃
不知京雒客何處更登臺

立春後二日偕友沂入南苑

芳春趨府事仙苑得同行
御馬鳴殘雪山鶯哢早晴地
遙知路密天近覺雲生羽獵何年賦相如自有名

又

上蘭多勝賞出郭見韶光
紫憶宮車小青旗店酒香乾

坤銷戰鼓歲月老書囊莫訝歸驄緩敲詩過野塘

偕芝麓先生友沂髯孫飲祖將軍園亭

挈榼尋芳野爭嘶白鼻騎古藤溪畔葉晴絮酒邊花午
裕臨風爽春旗過樹斜醉中逢野叟猶說舊侯家

裕齋對月共用餘字時先一夕月蝕

三徑芳樽合晴暉映綺疏今宵憐顧兔昨夜失鯨魚天
道微茫內人情患難餘一觴聊共飲吾已辨盈虛

讀書道院山杏盛開

避跡辭車馬，藜牀道士家。
門開因放鶴，客到却尋花。
久坐譚逾爽，官貧酒莫賒。
籃輿歸不遠，村樹隔殘霞。

偕胡伊人小飲步月至水次得安字

月色經今古，清宵共爾看。
紙牕中夜曉，玉笛一秋寒。
醉許深杯共，情因小步寬。
溪烏方繞樹，三匝未能安。

飲漢石寓齋得孫字

納納乾坤內，文章我輩存。
彈棋消勝負，命酒得寒溫。
雨細桐無響，霜高菊有痕。
不知秋草色，何處送王孫。

入直

紫極當天緯黃扉近外朝
兩窻分日月三殿共雲霄
柳密金鋪暗花深玉漏遙
雞栖逢丙夜展轉更無聊

過御河見冰泮有感

幾日條風至皇州景漸融
河水消獨鹿春色到盧龍
竹箭非難渡關舟未易從
鄉愁不可極采采夢芙蓉

喜晤存永

憶昔揚州陌論文遂盍簪
十年稀見面萬里獨關心
月

冷悲彈筑天高哭斷琴平生風義在老淚濕衣襟

聞開仲歿于湖上

二仲當時徑今唯孺子來幾回看舊咏一哭盡多才
猛虎行誰咏蒼蠅弔可哀幸聞收傲骨有客在湖隈

送人歸里

關塞雪初盡大河春水生送君歸薜荔值我憶柴荆
浪穩怡鳧性雲高出雁聲故鄉烟樹外立馬一含情

七夕

天地方如此江山又早秋玉繩低宿燕銀漢指牽牛去
住憑槎梗行藏笑柳州余心甘用拙瓜果復何求

又

兒女平生意茲宵信奈何仙人施錦幄小婦賭金梭鄰
杵星前急鄉書夢裡多更愁河渚下羅襪易成波

又

不知霄漢上果否鵲橋橫今古秋多怨人天夜有情風
飄珠露下月傍彩雲生獨笑羈遊客流年暗自驚

九日芝麓先生偕友沂招同綺季眉倩集龍槐
精舍用重陽登高四字為韻

秋色登臨見良辰步屨從輕陰來急雨遠黛出羣峰寺
古庭槐禿城斜御柳重他鄉萸菊會三歲此相逢

又

節物方蕭瑟諸君興倍狂笛聲搖暮靄杯影送殘陽落
雁風無次寒蟾晚更蒼曠懷難自極不為學長房

又

寂寞東籬後，籃輿此一登。
塵閒知地迴，木落見山層。
促席催歌板，成詩偕佛燈。
從來矜眺覽，卜夜許誰能。

又

歲序移今古，江山復我曹。
樹從前代老，月為酒人高。
戲馬知誰是，歸鴻望轉勞。
黃花消息在，餘興托霜螯。

長安月

明月東南出，光先及鳳樓。
千門方送晚，一笛早吟秋。
露葉鳴宮瓦，霜花點御溝。
九衢車馬跡，涼影共悠悠。

忽忽

忽忽常無思，秋來自鮮歡。
祇緣安薄命，不敢賤微官。
夜永清觴淺，天寒紫褐寬。
子雲方執戟，竒字與誰看。

初冬

秋色既云暮，客心殊自遐。
晚雲低一雁，早雪喜羣鴉。
砌擁敲窓葉，籬荒對酒花。
故園書不至，憔悴向京華。

美人曉起次紫來

日映鸞紗薄，美人春態生。
鬟偏釵影重，臉印枕痕明。
索

鏡看殘靨焚香解宿醒無端思昨夢悄覺兩眉橫

美人照鏡又次紫來

曉起忻慵半盈盈鵲鏡前黃因一夜淡紅向兩邊妍量
髻安珠纈留花襯寶鈿粧前看同伴時世許誰憐

傀儡

傀儡緣誰起居然號郭公衣冠原自偶嘖笑一何工技
畫燈光裏身忙舞袖中漫嗟生氣少土木是微躬

撲滿

自入鄒生札型模實未殊空虛寧有待盛滿不堪虞腹
脹彭亨承胸藏朽爛跂可憐蹉跌後中抱亦區區

風鷲

一綫兒童力凌風托野颺竟忘非羽翼頭敢恃雲霄側
目疑文燕昂身趨早鵬只憂風勢猛高處轉飄颻

假面

髹飾何堪爾人形亦偶然無端增點染轉擬混媿妍
許村駭畏嬌容婦媪憐誰知真面目遮却在君前

文官果

佳名因供御此種自齊州脂綠蟠蝸尾房青剖雁頭脆
分山栗早嫩占楚蓮秋草木誠何事居然第一流

銀桃

不意綏山實于今改素姿洗曾經玉井嘗合在瑤池巨
核珍皃卵寒漿沁蜜脾西京徒有託霜後漸離離

頻婆

梵域傳佳種初秋實轉新平坡原不誤上苑自堪珍甜

益清霜味香生小月輪何勞漢川使還與問江濱

葡萄

亂藤宜插架綠蔭避炎蒸珠帳深留雨晶丸冷瀉冰露
枝乘曉摘霜蒂傍秋凝誰愈文園疾涼州釀一升

壽叔攜具偕仲潛東只飲慈仁松下

寺古多奇樹虬龍偃碧苔為看松上雪同覆月中杯坐
久春裘薄詩成晚磬來尋芳仍有約風信漫相催

又

我媿狂司馬君能杖繫錢銀尊間寄傲玉版小參禪樹
懶雲橫地霞高月到天晚聞清吹發歌串復珠圓

小集分得斜字

客思臨流合頻來側帽紗夕陽樓影動春水縠紋斜汀
煖鳧初浴烟輕柳未花陶然今古意濠濮興非賒

仲潛移寓分鷗閣次東只韻

旅宿謀看月移居就此樓城陰孤岸迴山翠小閣浮浴
馬春潮急聽鶯曉樹稠故人曾有約分席與沙鷗

長椿寺夜坐對月同仲潛作

愛寂投僧宿君來亦不還
殘春生靜夜明月老空山
幽境能相許塵心自不閒
淡然同小坐風葉打柴關

長椿夏日次芝麓先生雜咏二十首

金馬浮沉日雲林託臥遊
披襟來紺宇開戶認丹丘
繡佛瞻螺髻滄洲羨虎頭
頗聞匡阜客蓮社總清流

又

蘭若無今古莊嚴浩劫前
蒲桃歸漢日松樹過秦年
白

日生新事青霞續舊緣詩人有姚合來許共秋眠

又

豈敢攢眉去名山夙有期間鐘涼月下移榻小風時草
密麋踪少林高鶴夢遲支公心不厭松塵夜同持

又

燕市塵空擾禪扉一徑深古碑前代字清磬故人心卷
幔懸殘日攤書坐晚陰耽幽惟我輩况此愜栖尋

又

日到招提路羊求亦共過
屐聲驚鳥雀燈影話藤蘿
醉以安禪減詩因遣興多
終須婚嫁了放眼向山河

又

未易辭車馬乘閒得任真
坐思千載事長愛百年人
白月留僧定青山恕客貧
可憐滄海裏吾已見揚塵

又

自笑孤雲在無端出岫來
饑驅方朔米愁損少陵香
穗三生結霜華兩鬢催
官梅東閣下慙負好花開

又

閱世紛多感年來不自安羊腸非詰曲馬首盡波瀾路
失燕臺廢天高蜀道難五陵逢俠少琴筑未摧殘

又

故里經年別而今夢亦稀江沉浮鯉信春老飯牛衣舊
雨空相憶秋風未易歸紅樓長獨倚翹首看雲飛

又

信宿蕭齋靜遙遙隔禁鐘息交過九夏匿影向千峰鰕

菜銷官興遽，蔭感病慵金。莖誰與賜，仙露不曾濃。

又

急雨朝來過，晴烟送夕陽。疎牕橫亂帙，高笛倚胡牀。
庭樹搖殘滴，瓶花落細香。所懷曾不見，別思繞魚梁。

又

至亦聊乘興，長為竟日留。獻花人掃塔，鬪茗客登樓。伏
枕聞朝唄，題詩謝貴遊。西峰何處好，一眺薊門秋。

又

縮地誠無計，寰瀛豈有圖。
舊游憐屈宋，離恨隔荆吳。
日暮羣鴉集，雲涼一雁孤。
夢中人不見，晴月擁黃蘆。

又

舉世誰相識，廬江感最深。
門生能荷屨，夫子愛彈琴。
櫻筍同春讌，茶瓜共晚林。
追隨多勝賞，懶慢自難禁。

又

近鼓離鸞操，衫痕接淚寒。
君心潮有信，妾意井無瀾。
金鈿憑誰訪，瑤環忍更看。
賴逢開士說，愁緒一為寬。

子方
喪姬

又

燈火長安剝提攜憶往年授書兒漸長襍被夢長懸映
日爭紅藥牽衣禮白蓮撫今增百感不必夜聞鶉

又

久閉牆東戶傍人謂著書豈知朝事懶實與世情疎步
緩雲廊寂吟高月牖虛季鷹真作達先我憶鱸魚

又

捨宅人何在籃輿我更來夜行龍井過春笑虎溪回蒼

荀香曾悟蜉蝣語漫哀誰能同逸少結侶上天台

又

世目榮華組余懷幸少營拙寧甘馬走貧不媿蟬清西
塞曾垂釣南陽久罷耕何時乘薄笨柑酒送鷗聲

又

古院浮深綠簷陰午欲齊槐香蟻入夢竹靜鴿來栖洗
硯晴雲濕籠紗醉墨低寧知孟東野冰雪句長攜

秋夕芝麓先生偕綺季哲文友沂周量貽上紫

來諸子集筑影齋得殘秋二韻

秋至易為感，況兼離別難。
酒尋燕市飲，月共庾樓看。
坐促蘭觴密，更深桂蠟殘。
起聞鴉繞樹，三匝正求安。

又

共作京華旅，清宵為爾留。
蒲桃杯借綠，老樹客同幽。
落木啼蛩晚，涼雲拂雁秋。
相思不可極，明月照重裘。

閏七夕和家玉駒

良期難再遇，匝月此仍過。
鵲記重來路，鸞驂舊渡河。
尋

歡寧厭數得巧不辭多獨有傷離客驚秋奈爾何

聞雁

候館敲孤枕飛鴻度夜闌
逼天聲易響入夜語猶寒
道遠求朋侶風高惜羽翰
莫傷歸計晚歸客計猶難

聞蛩

古甃經行少寒蛩咽露頻
何曾催織婦偏是近愁人
苔淺吟難穩莎涼怨或真
離懷原不寐寧用爾如嗔

聞砧

九月嚴霜急長安未授衣誰將思婦杵又下竇家機夜
靜聲相答更殘力漸微獨憐寒已甚還寢夢羅幃

聞落葉

落葉渾疑雨蕭蕭晚吹時敢辭彫歲月猶暫託階墀帶
露敲虛牖因風想舊枝飄零復何恨吾亦鬢如絲

石仲生先生邀陪洞門芝麓雨先生伯紫友沂
同集金魚池夜看冰月

寒益襄陽興臨池夜舉觴冰虛全化月沙濶迥如霜瀉

酒銀船滑分羹玉，筋香接羅真倒著。忘却到胡牀。

借星岍紫來駿，公豐臺看芍藥歸飲祖園。

尋芳客思同結伴，騁花驄翠楫穿深翠。停鞭見早紅，
千畦分曉露十里共香風。別路逢溪墅，班荆興未窮。

又

驅馬過林丘，名園繞碧流。人知非晉魏，客自得羊求。布
席聽黃鳥，揮觴謝白鷗。醉歸花壓帽，衫領暗香浮。

憶竹

記得西園路晴溪長萬竿翠深長似雨碧重欲成寒蔣
詡游常共王猷坐自看不知京洛客誰與訊平安

憶梅

何遜揚州夢尤憐東閣枝見常當歲晚香獨在寒時雪
老無蜂覺雲閒有鷓知江南詞客盡惆悵是春思

憶蘭

崇蘭何處密湘澧舊曾遊谷遠琴音寂江空佩影秋蜂
鬚知種異燕尾識香浮尚憶王摩詰黃蘗賞獨幽

憶桐

舊隱南牕下，亭亭有鳳條。
青琅初引露，碧玉競干霄。
扣石寧無響，為琴不待焦。
鷓鴣雖棲宿，在秋至漫飄。
搖

憶笋

頗憶貫當谷，胸中飽渭川。
猫頭能竟尺，犢角早勝拳。
鋤砍春泥脆，盤燒曉露鮮。
平生差免俗，真賴此君賢。

憶芋

沃野稱山郡，青烏復幾區。
羹寧稱玉糝，飯欲比瓊酥。
博

士霜盈故山僧雪擁爐那能啖半顆領取廿年圖

憶菱

本是江南客年年聽采菱白纖咀脆月紅嫩剝甜冰水
葉肥堪詠湖蓮冷漫矜誰言魚刺史作飯我猶能

憶楊梅

舊有南峰種金娑異衆栽日精鮮滿籠火實大于杯冷
沁吳兒齒紅分越女腮茶花堪並餉消渴待君來

長安柳用大復韻

垂柳長安陌飛花日暮天弄陰搖晚月疎影掛春烟繫
馬曾堪憶啼鶯劇可憐靈和當日事淒絕畫闌邊

題春曉亭次芝麓先生韻亭在蘄水綠楊橋為
東坡解鞍處楊傳人比部所建蘄乃芝麓先
生舊治也

蘭溪何處是雁齒占鷗沙尚有蘇公路能栽潘令花曉
風新社宇春水舊胡麻為問橋邊草青青幾度斜

又

聞說當年事清風一板牀烟霜存感慨詩酒付蒼茫百
戰青山古三春碧澗香漫同宣武歎攀折恨垂楊

又

賴有揚雲在紅亭集酒兵解鞍山月小浣筆野溪明亂
定生江草官閒夢楚蘅雙柑真不易寂寞為流鶯

又

髯公殘醉後君更幾回眠此地猶前日吾儕動隔年晴
烟開宿鷺老木響啼鶻峴首逢鄒湛還知叔子賢

入天寧寺送徐子星給諫不值

招提穿宿莽侵曉露初晞古塔倚殘霧輕旂吹早暉塵
勞憐地僻客久愛人歸已復聞樵唱蕭蕭入翠微

送雁市還湖上

京雒不得意言歸尋舊湖一身隨敝馬六月盡長途倚
鞚投詩卷留琴別酒徒將子江上夢送子過東吳

又

每別常多惜茲行寧用嗟時危難結客身賤重離家夜

雨生蘆葦秋風足藕花湖頭好詩句一為寄京華

醉後宿米友堂紀事

一醉迷歸騎言留高士家夜寒知臥月夢醒獨聞花殘
墨朱絲暖餘香錦帶斜支機誰可問空擬泛秋槎

慈仁寺訪鶴問玉少不遇

有約扣禪關良朋杳靄間偶來斜日晚獨對古松還殘
磬歸僧定高雲讓客閒留題在蕉葉空剩墨痕斑

重陽後三日再集米友堂疊前韻

元卿夜啟闌蠟屐集花間月靜羣鴉息天高一雁還世
情逢酒淡客計向秋閒更有西山約楓林葉正斑

庚子九日偶醉采友堂漫題

偶然乘興至倒情醉花前不問王猷竹如登安道船繁
籌傾綠酒細雨密紅絃不覺聞三鼓歸途覓玉鞭

采友堂又疊前韻

慚愧淵明菊還來秋葢前有人橫玉軫召客泛銀船酒
夢三千草春愁廿五絃金吾方禁夜未敢輒遺鞭

紫來過齋頭共看次岳作畫

謝客柴荆掩孤心耐歲闌
徑憐羊仲到畫共虎頭看素
几寬晴日踈花媚晚寒
門前九遠路車馬自無端

送程石門

似爾猶卑伏天涯更此行
雲連關索嶺月照武侯城
捧檄安時譽題詩寄遠情
莫嗟為宦薄吾道有長纓

又

滇海烽初息君遊慷慨存
過家誇綵綬仗節到轅門
遠

微功名壯他鄉姓字尊故人相見後頻與問饔飧

邨後初成小齋寄何德峻

紀閨當中夏槐天暑未侵小園初卷幔上客正彈琴
砌藥餘紅淺簷藤接翠深坐來多逸事相望在披襟

又

避人遁後圃疎懶度年華適意隨紅粉攤書就碧紗吟
風聽檻竹待雨種亭花獨有離羣思蕭然日又斜

病目

盛暑難為病，蕭疎只倚牀。
無聊思舊雨，不住問殘陽。
藥裏從妻慣，談諧喜客長。
誰能復多事，青白效嵇康。

西園避暑

炎日水如年，追涼就輞川。
樹深東閣坐，花照北窓眠。
捲幔通新燕，攤書聽暮蟬。
遠山能不厭，飛翠落尊前。

又

避跡西園去，幽深客少逢。
移牀當片月，拄笏向千峰。
風動池邊芰，雲陰田畔松。
披襟同一眺，長嘯轉從容。

又

別墅無煩暑蕭疎對夕陽鶯啼春後急鶴夢夜來涼酒
綠高梧密冰紅細李香不知陶靖節何事慕羲皇

又

豈是襄陽路真同習氏池垂楊橫晚笛深竹響殘棋湖
海容支枕河山老賦詩竟然成獨笑閒步小風時

七夕偕敬微集西園期雨微不至

西園曾有約莫負一年秋遂載花前酒同登月下樓星

辰兒女事河漢古今愁不信張公子真為翠黛留

花朝前六日吳船小集兼送善伯南歸得迷芳

二字

偶有元卿徑來聞二仲隨離人將折柳稚子為烹葵酒
煖幽懷密花疎望眼迷此行能且住相約聽黃鸝

又

空階猶積雪客到欲尋芳興劇同揮塵談深屢易觴都
忘牀上下畧似水中央擬賦文通別愁心益渺茫

燕郊清明

韶華春已半景物自幽燕
結束馳金勒妖嬈哭紙錢
柳沿沙磧短花照墓碑妍
行樂吾生事寧為旅思牽

又

帝里多春色風光徧四郊
碧回芳草路紅折小桃苞
火向官厨乞毬看騎士拋
盈盈何處女陌上自相嘲

又

久厭塵中鶩春從郭外行
尋花荒圃遠煮茗石泉清
塞

北猶披褐江南早賣錫最憐當令節遇物動鄉情

送碩林歸徐州

徐卿懷舊里驅馬去彭城楚漢千山路江淮六月程傷
離楊柳盡招隱桂叢生為念蛾眉好高樓月又明

又

幾載鄉關夢持觴此送君歸裝沾塞雪遊棹入江雲辭
賦存孤賞圖書許共分隰西誰復在淒絕是離羣

許原文大令以酒炭見餉

官冷煩朋好書來動草亭烏薪分石鼎綠酒瀉銀餅未
必因人熟聊堪免獨醒歲寒諸計拙醉眼向誰青

題古石

雅士無凡賞高齋我所聞獨憐燕市月猶貯浙山雲幽
許梁園賭竒從米袖分遙知長嘯處終夕伴香芸

又

老石何年物頽然倚砌梅自生濠濮想曾見漢唐來古
雪眠枯樹涼雲漬瘦苔憑誰能一拜醉醒共裴裛

送箕山

李子真奇士論交歷歲時
別離燕市酒歌詠華山詩
問字人多有揮毫我獨知
送君江上去明月寄相思

除夕

今夕仍除夕長安已四年
試衣兒漸長剪綵婦無眠
夜盡椒觴畔春生樺燭前
坐聞鐘鼓動珮馬欲朝天

墨妙亭和辰六

墨妙傳遺好亭空不可尋
寒梅前代樹老石古人心
過

眼雲烟冷傷懷歲月深披榛無斷碣惆悵付閒吟

韻海樓同弘載子壽作

危樓臨廢圃猶是昔年餘官舍俱為客前人獨著書
寔分山翠入幔卷晚雲舒魯國英靈在憑闌或啟予

圓證寺同長庚諸君小泛

幽境應難到乘閒偶共來亂香迷竹樹深翠出樓臺
苔色疑留屐泉聲欲泛盃白雲如有約日暮重徘徊

窪尊亭同楚皖作

曾聞唐左相此地往來頻
今古留殘石湖山為酒人
竹開孤徑晚花發五亭春
我不來同醉應慚頭上巾

道場山次燕孫

蘇公池上過伏虎舊名存
吳越雙峰出湖山一塔尊
亂雲橫石磴夕照滿漁村
郡閣長相對應憐月一痕

法華寺畫壁

蒼松一徑遠松裏化人城
古壁多雲氣滄洲無世情
紅螺浮水見白雀占枝輕
共拂殘碑字襄陽亦此行

過鴛鴦湖

二十六年前高樓尚宛然
舊遊空歲月新事到山川
礎石埋荒草簾珠墜野田
憑欄更無處漁唱起寒烟

憩虎跑寺

一徑入深樹古藤當道傍
寺圍山靄翠泉帶岳雲香
花藥虛堂靜茶瓜午夢涼
坡仙有遺句傳寫入奚囊

鶴洲草堂偕季默坦夫

放棹尋鴛水停橈問鶴洲
荷高香入檻竹密翠遮樓
有

石都能瘦無溪不占幽鳥魚渾自得盡日為淹留

又

水部詩應好東山許容俱一園開兩徑孤閣見重湖着
處安棋局隨行得畫圖再來知未厭留約與沙鳧

夜宿西湖次子壽

為愛西湖好中宵上畫船水雲雙塔影花氣六橋煙酒
坐隨鷗鷺漁燈起管絃神清翻不寐晴月共娟娟

法相寺

勝地留遺蛻招提古木橫佛容人乞子僧強客題名竹
覓飛寒溜松窓坐晚晴滄洲吾不厭臥對約秋清

岳武穆墓

老檜何年盡荒祠此尚存名成三字獄家破兩朝恩
俎豆秋攜奠旌旗夜返魂誰知千古事惆悵不堪論

鳳味泉

絕壁何年鑿清泉欲滿池客來花外屐僧鬪雨前旗
筍熟春齋潔蕉深午夢遲誰能招陸羽清話為傳覓

半月泉

清流堪濯俗半竇欲成池信是無窮處常于未足時雪

痕翻蠚眼天影瀉蛾眉同地看雙派形全已致虧

別有米泔

泉已竭

過橫山

勝日尋佳地橫山路不分竹連高下嶺松往往來雲木
老秋將脫鐘寒午一聞清言真未厭傾倒為諸君

歸雲菴拜孫太初墓同燕孫作

何處覓榛闢林中宿草斑殘碑生白雪高士有青山春
淺花猶夢天空鶴未還託交憐異代惆悵夕陽間

孺子祠同澹心辰六

孺子何年隱荒祠此地留野人忘姓氏殘碣紀春秋天

淨孤鴻急山深萬木稠却憐題榜誤無復舊南州

榜書南州

高士士

誤寫時

五峰萬玉菴墻角得古梅樹特為出之

吾道寧言命寒花亦有時可憐當殿樹猶是隔墻枝歲

月空山老冰霜衆豈知護持煩淨侶珍重為題詩

贈雨青上人

支公能好鶴閉戶託香林庭樹一何靜湖光相與深帆
開知雨霽磬響落檐陰我自勞勞者逢君生遠心

瑶席池

為訪坡仙跡行來一衲隨閒吟能送日深坐獨臨池水
碧花交處霜紅木老時歸從郡樓望嵐影正參差

典裘

出都有三裘至廣陵友人復以貂贈燠哉范
叔可無寒也丁未秋盡付質庫一以毛脫獨
存湖山風雪披服間尚有魯靈光也幸矣

貫酒曾為爾官貧近復然賤酬增僕恥勤曝益妻憐深
厚聊思貉竒温定屬綿如何五湖長不及敝秦年

質珥

予少更多難內子備極流離乙巳夏

覃恩封宜人拮据為具六珈云報也丁未在郡亦付子母家成

兒周堂日不能備禮服馬北門之謂賴德耀其庶幾乎

象服邀

天寵相酬幸有端

恩榮纔五馬驅使及雙鸞翠減花奩空珠銷綠鬢寒琴臺
同一笑庶婦亦為難

解帶

丙午過苔川儀鳳橋解金帶助輿梁之役旋復置一
圍腰未煖而以急廢之嗟哉萬釘九環亦有神命耶

巧樂聞前識園金忍見辭非關留鎮寺不暇去題詩望
失裴還日思添沈瘦時黃銀誰更賜空自記犀昆

鎔杯

鄉俗往來多用卮筭近習務作偽以赤堇勝
大抵不及三鑲耳然蕉葉匏子急中盡付冶
工存篋中者皆不材也何若竹根木瘦稱耐
久朋矣

樂聖平生志銜觴竟鮮終寧言真羽化只是費爐鎔耿

雪成何易陶中漉未慵瓦盆翻自得長占酒泉封

次韻送徐公肅遊閩

丘路桃千樹春來色自妍那知分手處即是看花船作
客添塵袂留詩當別絃十年吾黨淚今日共潸然

又

暫遊非得已驪唱沉重聽命酒辭銅峴看山過慢亭弟
兄眉總白天地眼長青應有相思夢隨君到紫溟

方菴小憩

觸暑湖干路香林訪索居因開高士篋多見故人書花
淨知秋早山空得雨餘尚憐吾道在支許自蕭疎

立秋日小飲吳山

道室臨平楚閒來遂遠情城連秋嶺綠江湧夕陽明羣
動浮烟色孤懷坐磬聲自憐隨世役終日困塵纓

又

萬木登高盡孤臺倚曲廊風傳遙浪急秋報衆山涼石
老峰爭瘦林深葉易蒼開樽同一眺清興幾能忘

壽豁堂和尚

我愛高僧傳，惟君似遠公。
一筇明月下，半偈藕花中。
坐上看誰答，溪邊笑每同。
偶來參玉版，揮麈對烟叢。

歸雲菴夜泛同愚山阮懷諸子

山晚離城遠，寒新怯暮遊。
亂峰爭落日，一徑入深秋。
清興因官懶，詩名借客留。
何時能解紱，終夕對滄州。

遊東林山

石磴藤蘿上，寧辭屐屨勞。
砂靈雙井冽，天曠一亭高。
翠

樾迷荒塋山花引濁醪清風不可見孤磬出松濤

尋幽

尋幽無宿約乘興過山家秋色鷗邊路斜陽雁外霞翠
深遮寺竹香遞過船花近郭鳴笳鼓紅燈點鷺沙

與雲止

但有相思在何妨跡暫疎黃藤煙寺酒紅葉雨林書西
塞魚同釣南山豆共鋤終焉吾有志歸訪卞田居

湖上遇星胎即飲寓樓

不減狂奴態相逢老益親青樽閒過夜紅袖晚留春欲
嘆翻成笑無才幸有貧兩峰霜葉在爛漫屬門人

萬玉庵古梅詩

康熙丁未行部雒城游萬玉庵於牆外糞壤中得古梅一株濯

而培之繚以粉垣使近堂下用賦一詩是記其事庚戌罷郡再過其地意且復淪叢莽而芳條轉茂則色侯韓君子久以石欄護之倍加愛焉嗟乎金城之柳宣武見而傷情東陽之槐仲文攀而隕涕甚矣卉木榮悴之故其感於人心者深矣茲梅亦何幸而復保其歲年也哉復作詩一章併前製題之於壁庶後之君子有所觀感也夫

得樹當年事重來想鴈堂歲時空冷落草木少炎涼載

酒人還到巡檐思轉長
不須憂剪伐仙令在河陽

泊八里灘

漸遠青塘路蓬窗懶更開
山煙孤塔迴湖色亂帆來
吾道存書卷餘生託酒盃
寄言鷗鳥伴從此莫相猜

姜及生水部招飲家園

名園堪日涉清讌此時同
雲月登臺處湖山閉戶中
簾陰秋樹碧絃語夜燈紅
更有追陪約還應似謝公

坐來翠閣

小樓秋縱望，日日到斜曛。
自拂烏皮几，閒書白練裙。
見山如得友，與客共看雲。
為問南湖水，還容月幾分。

和寒食即事

獨坐搖吟膝，空思賦遠游。
載花青雀舫，對雪紫鸞裘。
五載依山住，全家為酒留。
終須浮舴艋，分席向沙鷗。

再至長興

乘興何妨再，尋梅入雉山。
雪如隨客到，春不讓人閒。
送酒思纖手，聞歌破老顏。
烏衣羣從在，相得竟忘還。

偕張僧持茅天石諸子庚邨看梅

雨後春陰好尋梅到野塘
客筇隨亂水僧磬出寒香
澗石留餘雪山煙動夕陽寧
言來已晚吾自惜年芳

又

偶然南郭路老眼忽為明
惜樹成孤賞留花愛小晴
此中誰放鶴幾日又聞鶯
欲折無堪寄春風漫不平

鹿柴庵同僧持作時僧持將歸白下

將離逢勝地去住惜年華
白髮俱無語青山不當家
同

僧參柏子留客飯桃花且住何辭醉同傾盞內霞

飲丘路桃花下

憐春不惜醉屢憩野人家芳樹爭初日晴溪隔亂霞到
山朝飯笋歸閣夜分花勝事心相得寧憂鬢欲華

雨後再過塘栖

程急無容泊懷人夢草堂菰蒲雙岬濶橋袖一村香客
思隨雲黯漁歌帶雨涼平生離別意多在白鷗鄉

伯通招讌寧遠堂觀劇

良夜開佳讌紅燈照薜蘿湖山詞客在煙月酒人多勝
事應如此清歌且奈何寧須更投轄山簡自婆娑

和人寒夜即事

激楚生豪况寒燈夜獨親冰霜孤劍影山水一琴身懶
愛陶元亮狂呼賀季真不知今夕意誰復兩閒人

湖上尋無公次韻

別院煙波上幽栖見古風到門雙白鳥夾徑兩青桐夜
色聞鐘後秋聲閉戶中支公多逸韻將鶴寄詩筒

送辰六歸廣陵

作客滄江上，含悽并此辰。
雲飛歌舞地，花焰亂離春。
別緒添中歲，才名屬後人。
艱難吾道在，前路慎知津。

秋日集翁蒼牙草堂

清秋多遠思，小艇泛城隅。
此地猶三徑，吾儕共五湖。
晚雲歸澗樹，夕照隱江蒲。
醉聽菱歌發，還教綵袖扶。

探梅鄧尉山，夜入萬峯禪。
院尋瑤如禹，存不值。

過宿聽松堂

每芳寧憚雨靜夜陟高峰積雪明樵火亂香搖梵鐘隔
林燈語細入坐酒聲濃借問停橈處烟花已萬重

初八日由王家莊至董墳馬家山看梅

雨止晨煙破看花路不遙鶴隨登澗閣蜂引過溪橋湖
水照逾淡山香吹不消茲游清興好歸路一詩瓢

水哉軒和尤悔庵韻

出岫原無意曰歸何不然一家楊柳國六月芰荷天野
鶴聞高咏沙鷗看醉眠煙波於此足莫向世人傳

同諸子城南小步

小步郭西偏閒情亦偶然柳絲沽酒市蘭葉載花船六
代青山外三春白鳥邊歸來仍我輩作計好留連

又

一醉寧容易今朝醉頗宜紅橋春水上白袷晚晴時草
欲催歌發梅因待酒遲海鷗能對客不必主人知

宗梅岑過訪

人憶少文賢離居復幾年歸來雙燕後病起百花前小

飲攜蠻榼長吟鬪蜀牋不須論往事一醉且陶然

卧疾錦樹亭寄懷辰六

離別尋常事與君獨不倫
半春花過眼深夜月當門
老覺親朋重貧知科第尊
上林應有賦傳寄錦沙村

慧泉和立齋學士韻

合在中冷上虛將第二傳
潤沾十萬戶清徹幾千年
欲証茶仙佛能分酒聖賢
如何爭汲罷雪乳更淳然

咏玉蘭

謝氏何年樹香從楚畹移照人無月夜對我欲晴時皎
潔原難並芬芳復待誰偷看疑是雪蜂蝶爾何知

晚過趙處士寓樓

初晴宜着屐誰意踏烟鬟游子方聞笛幽人正啟關斜
陽紅斷雪高月翠空山倚檻舒長嘯乾坤幾客閒

集惠山天均堂

梓澤人何在寧知此論文亭流二泉水樓貯九峰雲疏
鑿安春草繁華任夕曛吾家有康樂幽興本難羣

陳集生攜樽招飲高汝敬山齋

救時無善策行樂任吳天為載聽鶯酒來每放鶴船玉
釵過碧樹金管沸紅泉莫便傷春莫西川拜杜鵑

又

豈謂鶯花老偏於魚鳥親吟詩消永日貫酒送餘春風
雨三更夢江山六代人不須同漆室歌舞向西神

再過趙處士山樓

春晴殊不易小霽遂每幽野雪纔分樹山煙忽滿樓壺

觴臨水得步屣起花留歸路誰相識新來拜醉侯

寄暢園雜咏卧雲堂

至知魚檻共九首

路入幽香遠斯堂敞翠微花深涼客夢樹古綠人衣對
月渾忘醉看山不愛歸晚來巾帶濕嵐氣未全稀

栖元堂

洛下傳名種空亭竟絕塵誰家猶滯酒此地獨藏春金
粉無寒色樓臺有麗人相看知解語酌酒向花神

杜鵑書屋

幽館堪遙集，回廊窈窕通。
石高偏有勢，花晚自成叢。
夜月憑誰聽，斜陽作意紅。
可堪春漸老，惆悵對東風。

鶴步灘

纔過石梁盡曠然，心復開。
梅花今歲晚，一鶴幾時來。
渚淨飛黃葉，磯空長綠苔。
高吟人不見，清影自徘徊。

石徑

躋岿不覺遠，此日我來游。
屢轉路疑盡，獨行心自幽。
高林終日雨，飛瀑四時秋。
小坐尋蒼壁，題名在上頭。

三疊泉

絕頂名泉注奔流向此間雲飛千尺澗雪濺六朝山
迅急欲何似琤琮知未閒獨來嘗倚杖清聽不知還

嘉樹堂

為堂宜近水似此獨悠然萬綠千忘日一泓波浸天
擁書堪永坐看奕任高眠滄海新詞好微雲復幾篇

宛轉橋

一道朱闌影橫斜界線塘自然成鴈齒何必似魚梁
紅

袖連春色烏紗倒夕陽寧知羨魚者愁絕在中央

知魚檻

入門無俗境仙客水為家三面清波動千章灌木斜就
陰常聚葉爭食誤吞花誰更知魚樂蒙莊興自賒

惠山德水亭傍大樹為風所撼或請伐之澹心

作留樹詩因次其韻

陸羽煎茶處江南獨此亭有人如水潔得樹與山青歲
久烟霜古天空草木靈遭逢真羨汝摧折我曾經

又

本是何年植栽培復再新湖山原有主風雨信非人應
共花開洛寧憂梓化秦請看多事日此地獨陽春

園居

園居宜永晝雨止興猶清一鶴照新水亂鶯啼早晴賭
茶書共檢看竹坐常橫獨有耽詩癖年來太瘦生

和留仙韻贈蘇崑生

兩生今獨汝念往倍情親劉表呼鷹日蘇耽化鶴人貧

常懷舊感癖不受纖塵花底聞高唱淒涼未老身

喜僧持至夜坐秋水閣

江海方蕭瑟逢君得自然論文今日共同學幾人傳魚
戲水中月鳥衝巖下烟紅橋一相送山磬發遙天

其年僧持淡心集生過訪寄暢園回家枚吉暨
潛兒小集澗中分韻

無客意不適客來生遠心松陰分小憩澗響入微吟老
樹閒中古名山醉裏深幽情知樂極橫筵晚披襟

又

離居因愛靜遠涉喜過存新竹香三徑晴山綠一門流
觴疏水脉脫幘卧雲根詩就聞疎雨微凉倒酒尊

同僧持飲高汝敬山齋次香海韻

積雨閉深翠故人同在山泉香家釀美花靜客窻間江
海羣居外烽煙一醉間酣來發長嘯澗響共幽潺

僧持香海汝敬小集嘉樹堂分韻得十一尤

南軒宜避暑坐久益成幽溪色忽生樹泉聲多入樓客

期明月共天許夕陽留莫問山亭路煙鐘濕未收

和淡心訪南邨惠麓山房過憩寄暢園韻

不意此相見把衣臨水樓地幽偏耐雨人澹竟如秋宿
鳥啼烟翠飛花送瀑流碧山烽火外分日思同遊

又

嗟爾來何晚翻令緩我歸一江春水隔十載暮雲稀侵
曉常攜屐辭春未改衣時艱難寄跡莫便欺人扉

又

莫問英雄事年來但聽鶯何堪今日耳猶是故園聲山
水無人境煙花不世情逸持一盃酒相勸隔重城

中秋夜偕又蕙前民山尊湘九集扶晨寓齋分

得亭風二字

清宵不易度屐齒破苔青微雨月中夜涼花秋一亭酒
貪浮蟻醉歌雜亂蛩聽人事方無定靈均漫獨醒

又

旅次歡場少高歌且暫同乾坤杯影外晴雨燭花中夜

迴孤臺月秋清一笛風誰憐遠遊客明日又江東

焦山

江海爭雄處歸然壓亂潮世猶知有漢山肯不名焦樹
色無今古波光變暮朝時聞清吹發磬響落層霄

宿再公房

不復言文字山僧致頗殊辭名因悟得留病與閒俱摘
豆朝飡客澆花日課徒有誰來問法秋色滿庭鋪

松寥閣待月

高閣收羣爽煙波盡此間何人能便去有客願長閒
夜色月終古潮聲秋一山乘風思羽翼仙鶴幾時還

三詔洞謁焦處士遺像

尋雲穿石徑峭壁倚苔痕在昔無廬住于今有洞存
三徽猶不出一夢復何論欲問幽人事驚濤拍海門

遇吳羽士小憩雙峰閣

探幽寧得倦絕頂叩禪房但覺此中曠不知何處香
秋多山正紫江冷樹先黃賴得逢脩靜蕭疎共夕陽

霹靂石訪瘞鶴銘

古碑不可讀半墮在江濱
空有轟雷石誰為問水人
龍寧知識字鶴自不謀身
搨徧昭陵本蘭亭總未真

登甘露寺凌雲亭

古寺干戈後登臨未盡無
寒雲千堞繞細雨一亭孤
壁影迷黃鶴江聲老赤烏
天風吹我去惆悵是東吳

雨中登多景樓

多景留題在憑欄憶昔遊
誰憐千古恨都作亂帆秋
山

陡雲生屐天空雨入樓不須頻北望花月自揚州

北固山下尋狼石不得

抵掌傳斯地遺踪沒亂叢
兵戈銷鐵石山水記英雄
壘散荒烟黑旗飄野日紅
想當埋竈處磨削任兒童

望金山

年年頻問渡欲上渺無從
不信名山路難留倦客踪
帆檣隨雁鷺鐘鼓駭魚龍
會挾袞絢至狂歌最上峰

九日雨中集心遠酒樓分得十一真

密雨艱遐眺，尋秋意未伸。
樓能留刺日，酒不負佳辰。
樹老憐人換，花閒愛客真。
只愁騎馬滑，倒著白綸巾。

九日夜集葛川書室得風池二字

登高不可出，向晚過牆東。
節物無人外，秋聲在此中。
艷歌雙鬢白，濁酒一燈紅。
遙想龍山畔，惟多落帽風。

又

重九真難負，閉門當此時。
有杯酬歲月，無地不山池。
秋許閒人得，詩防俗客知。
誰憐籬外菊，開徧戰場枝。

前民扶晨山尊湘九過集錦樹亭分韻

半日不相見叩門呼老龐
懶雲秋入屋寒雨夜連江
酒國全無事詩城未肯降
莫將離別恨容易到西窓

蛟門招同孝威豹人鶴問小集

有客來從遠前期向草堂
園林新闢逕花竹對銜觴
世事閒中過人情醉後忘
也知文字飲絕勝管絃忙

又

別離經幾歲相見復今年
客子頭俱白先生意獨玄
花

香生酒畔鴈語落燈前
騎馬寧愁滑蟾光正滿天

和友人韻

雨為新寒密山齋不肯晴
鐘搖諸品靜紗護一燈明
虛牖憐風度幽溪待雪平
賴聞禪客語揮塵說無生

宿卧霞閣寄前民扶晨山尊諸子

避俗愛逢幽憑高忽此樓
乍來諸嶺霽獨立大江秋
遠樹分晴靄斜陽疊亂流
故人俱逸興惆悵不同遊

月夜同念昔及季兒登卧霞閣

畫檻凌空出清宵露氣冥江流千里碧樓倚四天青岸
水全疑月檣燈遠亂星憑欄歌一曲人在夢中聽

獨樹軒為許石園明府作

老樹何年得亭亭欲出羣曙光江日上秋色縣人分落
楫能供酒乘陰好論文我來頻徙倚高詠不如君

陸冠周尋父麗京先生道過真江以詩見贈依

韻奉答

雙鯉憑誰至開扉夕向闌展書欣示客得句勝除官遇

惜年華晚才增骨相寒懷中字不減肯借俗眸看

又

寧須如束皙更作補亡詩性至渾忘險情堅轉似癡難
從豪貴說應得鬼神知好我非無故惟憂愛所私

又

歷涉終無恙懸知孝思靈少年頭欲白舉世眼難青問
道過蓬徑忘餐坐草亭曲應慚白雪猶得藉君聽

又

棄置煩明主，端居笑不才。
如何萬里外，偏為一人來。
山水情遠，冰霜旅思哀。
徒傳知己語，懷抱暫時開。

又

天涯何限路，終日但棲棲。
是處詢遺叟，頻年別故妻。
無家應自苦，有物豈能齊。
句裡殷勤字，遙憐帶淚題。

又

新篇傳示後，高咏未能休。
莎草他山上，梅花舊隴頭。
父書空憶國，客帳枉封侯。
那得程鄉酒，為君遣四愁。

又

聞向真江去依然嘆莫容危途難跨鶴浮世薄雕龍塵
滅囊中刺歌殘廡下春紛紛鴈門雪欲往更何從

閨中雜詠

作畫

繡倦調鉛素還疑繡未真誰稱李公妹獨愛管夫人山
水催情曉鶯花借手春玉奴贏一笑吮墨染朱脣

鬪草

三五憐春日盈盈罷浣紗分畦拉腕玉著地展羣花強
識無名葉先尋乍吐芽偏誇諸姊妹今日讓兒家

窺簾

花下誰相待含嬌隔翠筠驚鴻時半面飛燕不全身秦
女初乘霧甄妃本隔塵誰言難得見遙見可憐頻

度曲

小院花陰寂春嬌試曼聲當風吐字怯向月轉喉清只
許瓊簫和頻看綵扇傾周郎能顧誤無語漫多情

奕棋

搖颺銅池日風光合劇棋得先從婢學偷劫怕郎知
慙極推枰數嬌多下子遲金釵贏取在不放小搗兒

葉戲

葉戰南唐戲偏宜在麗娟慧心能合縱好語愛團圓
錦賭衝時奪花爭散處先漫言情似紙輕薄更堪憐

走馬

紫燕來金埒嬌姿捧上鞍花前迴轡易柳下舉鞭難
翠

重愁鬢側紅光怕
鐙寬憑誰誇出塞
莫作蔡姬看

秋千

寒食盈盈侶相將
效半仙紅裙柳陌
外線索杏樓邊腰
細如奔月身輕欲
上天下來垂繡帶
曾不動珠鈿

撲蝶

蛺蝶從何至雙飛
小院深綺羅三月
影花草一春心故
惹香紉小還過繡
戶陰輕狂知不那
引笑復相尋

教鷓鴣

翠羽能相伴聰明愛不羣傳茶消寂寞報客致殷勤罵
逗檀郎惱呼教小婢聞春來解人意惟有綠朝雲

過惺寂上人

偶爾維孤艇尋幽過竹房松杉前代老橘柚晚度香
法攜紅袖探書出錦囊清談能竟日山鳥共禪牀

過施子里村居

言尋揚子宅步履過林丘柳色行三徑梅花卧一樓地
偏春獨早人靜月同幽更有南溪約相迎是白鷗

朝爽臺

山氣當秋霽朝來望獨賒
人情澹丘壑天意愛雲霞
放眼欲無際曠懷寧有涯
王郎信多致拄笏岸烏紗

飲江深閣

挈榼過芳野花深戶轉扃
春非塵客事月在酒家亭
破雪山爭綠於風柳漸青
醉鄉歡易足莫負草堂靈

雨後同士稚季兒小飲月榭共用來字

晚霽登重榭臨風酒一杯
夕陽高樹見春色大江來水

霧依山斂吳雲入楚開不知天際客閒却幾樓臺

秦淮夜泛

兒子諳遊性呼舟古渡邊柳陰雙槳月花氣一船烟夜
覓聞歌地秋當載酒天胡牀思舊事三十二年前

扶晨山尊嶠賓來自廣陵小飲桃葉河亭分得

吹字

作客長懷遠歡遊少定期月中人忽到江工笛初吹桃
葉可憐地菊花宜醉時今宵不同飲幾夜又相思

不寐

孤枕雙眸炯呼燈更倚樓
月添千里思霜白五更頭
秋醉不得夢夜吟聊免愁
依人誠計拙吾道總悠悠

水樓小飲徵事因憶仲兒

客夜難為夢偏宜濁酒杯
破寒孤燭在聽雨一瓶開
秋盡花仍淡江空鳥不來
呼童檢唐韻坐久句還裁

金陵旅懷

鍾陵不可到再到益傷神
白下多秋色黃初少舊人世

清江上淡客况雨中貧為語秦淮柳含烟帶早春

題掃葉上人山樓

修竹亭前路頻來興不孤萬山分旦暮一闌盡江湖客
至攤書卷僧歸入畫圖淹留常竟日幽鳥坐相呼

過隱仙道院

問法來仙院門開是處幽雲高雙鶴去地靜一廡留有
竹皆分徑無山不向樓月中金磬響時聽步虛遊

句曲曉行

夜來初過雨，曙色未全分。
羸馬衝泥出，荒雞隔浦聞。
遠山多受霧，寒日不驅雲。
衰草埋翁仲，溪邊認古墳。


鶴問招集寓齋得秋字

作客仍招客，多君意氣稠。
能閒翻為雨，得醉即宜秋。
落

小亭

小亭無四壁，秋色滿迴廊。
落葉和烟瘦，黃花待酒香。
雲

閑寒自碧樹，老晚逾蒼物。
候原如此，何煩宋玉傷。



林蕙堂全集卷十五